



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL



Komunikadu Imprensa

Periodu : Marçu 2012

Publikasaun : 03 Abril 2012

JSMP Kontinua Hala'ó Treinamentu ba Líderansa Komunitáriu iha Distritu Covalima no Distritu Baucau

Judicial System Monitoring Program ka JSMP, liu husi Unidade Suporta Vítima ka *Victim Support Service* (VSS) fasilita treinamentu iha suco rua ne'ebé diferente hanesan Suco Fatumea sub-distritu Fatumea Distritu Covalima iha loron 22 fulan Marcu 2012 no Suco Fatulia Sub-Distritu Venilale Distritu Baucau iha loron 26 Marsu 2012.

Treinamentu ne'e realiza hanesan mós ho treinamentu hirak ne'ebé maka hala'ó ona iha tinan kotuk liu ba, treinamentu rua ne'e sei nafatin realiza ho topiku "Kódigu Penál no Kódigu Prosesu Penál husi Perspektiva Vítima Violénsia Bázeia ba Jéneru, Lei Kontra Violénsia Doméstika, prínsipiu sira ne'ebé hatuur iha Konstituisaun RDTL no CEDAW" liu-liu ne'ebé garante igualdade jéneru.

Partisipante husi treinamentu ne'e mak hanesan xefe suco, lia nain (*ancião*), xefe Aldeia, representante feto rua, inklui juventude feto no mane ho mós comunidade balun. Iha Suco Fatumea partisipate sira hamutuk 35 ne'ebé kompostu husi mane nain 19 no feto hamutuk nain 16, iha Suco Fatulia partisipante hamutuk 26 ne'ebé kompostu husi mane 10 no feto 16, husi Suco rua total partisipante hamutuk ema nian 61.

Diretór Ezekutivu JSMP, Luis de Oliveira Sampaio haktuir katak, *treinamentu hirak ne'e realiza ho intensaun atu hasae no hametin líderansa komunitáriu sira nia koñesimentu konabá mekanismu oinsa atu refere kazu hodi bele asesu ba sistema justisa formál nomos atu enkoraza líder komunitária sira hodi halo prevensaun no buka meius oinsa bele hamenus violénsia hasoru feto no labarik iha sira nia suco laran.*

Iha parte seluk xefe suco Fatumea iha ninia intervensaun ba programa treinamentu haktuir katak *“treinamentu ba Lei Kontra Violénsia Doméstika no Kódigu Penál ne’e importante duni hodi regula konabá hahalok violénsia doméstika hanesan krime públiku. Mesmu nune’e, nia mós haktuir katak to’o agora iha ninia suco comunidade barak maka seidak hatene didiak konabá informasaun hirak ne’e”*.

Aleinde ne’e , xefe suco Fatulia hato’o katak, *“hanesan autoridade lokál nia sente orgullu ho treinamentu ne’e tanbá bele transfere informasaun ne’ebé diak tebes ba iha ninia comunidade hodi nune’e sira bele hatene direktamente direitu no dever sira ne’ebé regula iha lei nomós prosedimentu legál sira” hodi bele asesu ba sistema justisa formál, tanbá durante ne’e kazu violénsia doméstika barak mak resolve tuir familiar, maibé prezensa JSMP-VSS nia halo sira iha kuinesementu naton konbá lalaok prosesu formál no mos bele separa kazu ne’ebé mak krime no sivil.*

Lidér comunidade husi Suco rua ne’e hato’o sira ninia rekomendasaun ba JSMP- VSS atu nafatin kontinua hala’o treinamentu ba comunidade ne’ebé iha baze tanbá iha problema barak maka akontese maibé sira la hatene konbá oinsa lori prosesu ba sistema justisa formál.

Tuir observasaun JSMP konabá aktividade treinamentu iha suco rua refere en jerál partisipante sira hatudu sira nia interese atu rona nomós proativu iha sesaun diskusaun nian.

Treinamentu realiza bázeia ba pedidu husi polísia skuadra iha sub distritu rua, katak kazu violénsia doméstika no violasun seksuál dala barak liu resolve tuir mekanismu sistema tradisionál

Programa treinamentu ne’e realiza tanbá hetan apoiu finanseiru husi USAID liu husi The Asia Foundation.

Atu hetan informasaun kle’an liu tan favor kontaktu direktamente:

Luis de Oliveira Sampaio

Diretór Ezekutivu JSMP

Email, luis@jsmp.minihub.org

Telefone: 3323883/7295795